

Ann. X.

ROMAE, Kal. Septembribus MDCCCCVII.

Num. IX.

# VOX URBIS


DE LITTERIS ET BONIS ARTIBUS COMMENTARIUS

SEMEL IN MENSE PRODIT

Premium annuae subnotationis, *ante solvendum*, est: in Italia Libellarum 4,80;  
ubique extra Italianam Lib. 6,25; Doll. 1,25; Sch. 5; M. 5; Rubl. 3; Coron. 6,25.

Inscriptiones et omne genus indicationes pretio aequissimo referuntur, quod est in commentarii operculo  
Lib. 0,10 pro unoquoque centimetro quadrato.

Cuncta mittantur ad ARISTIDEM LEONORI equitem, commentarii VOX URBIS possessorem et administratorem  
ROMA — Via Alessandrina, 87 — ROMA



## Subnotatio fieri potest:

### IN RUSSIA

Apud GERETHNER ET WOLF Apud "KRONIKA RODEINNA"

VARSIAE POLONORUM  
Rakowskie Przedmiescie, 15

### IN ANGLIA

Apud BURNS AND OATES

VARSIAE POLONORUM  
Krakowskie Przedmiescie, 6

### IN GERMANIA

Apud FRIDERICUM PUSTET  
S. Sed. Ap et S. Rit. Congr. Typ.

LONDON W.  
28. Orchard Street.

RATISBONAE IN BAVARIA.

### IN CANADA

Apud LIBRAIRIE GRANGER FRÈRES

MONTREAL  
1699, Rue Notre-Dame.

## RERUM INDEX

- Ex Germania.** — De catholicorum opera in re civili.  
**De re litteraria apud Subalpinos.** — I. De historia.  
**An aliquo modo Dionysii rhetorica defendi possit.**  
**Vox Urbis palaestra.** — Philosophus et Orator quo modo sese habeant ad invicem.  
**Papyri unde et quomodo eruantur.**  
**De duobus antiquis templis in urbe Intemelio.**  
**Horae subsecivae.** — Ugolini Della Gherardesca Comitis mors.  
**Philandri Bavari de aqua disputatio.**  
**Acta Pontificia.** — Decretum SS<sup>mi</sup> per S. Congregationem Concilii Tridentinis decretis interpretandis vulgatum circa regulas celebrandi matrimonium.  
**Ex SS. Congregationibus Romanis sententiae novissimae selectae.**  
**Diarium Vaticanum.** — Coram SS<sup>mo</sup> admissiones. — Pontificiae electiones. — Vita functi viri clariores. — Varia.  
**Annales:** — Mauritanus res. — Haganus de pace conventus alter. — Regalia itinera. — Inter Russiam et laponiam foedus iustum. — Italici motus in Catholicam Religionem.  
**Publici per Orbem coetus legibus ferendis.**  
**Per Orbem.**  
**Aenigmata.**

*In tertia operculi pagina:*

ZENO - Tragoëdia JOSEPHI SIMONIS Angli. (Passim retractavit hodiernisque scenis  
aptavit I. F.)

## ROMAE

EX OFFICINA PACIS, PH. CUGGIANI

35, Via della Pace

MDCCCCVII



T. ET G. FRATRUM PARISI  
**Pontificia officina Candelarum ad Sacra**  
Facularumque sine oleo ad noctem, decem horas ardentium.

ROMAE in ITALIA, in Foro Campi Martii, 6

Peculiaris candelarum liturgicarum fabricatio ad S. Sacrificii celebrationem - Cerei Paschales  
- Lumen Christi - Cerei ad Officia Tenebrarum - Cerei ornamenti decori ad baptismata et  
Sacram Synaxim primum recipiendam - Filum cera madefactum ad candelas accendendas.

*Merces ad omnes orbis portus nullo impendio iubentium, ne pro colligatione quidem, mittitur.*

**REQUIRANTUR CATALOGUS ET PRETIA**

Officinae honores concessere Summi Pontifices PIUS IX, LEO XIII, PIUS X.

Commercium epistolare habetur Italica, Latina, Anglica, Gallica, Theutonica, Hispanica lingua.

Sociis et lectoribus officinam hanc Candelarum ad Sacra enixe commendamus,  
quae per orbem universum operis suae fructus iamiam disseminavit.

---

## SUPELLEX AD RES DIVINAS

---

Commentarii VOX URBIS administratio recto tramite suppeditat supellectilem omnem, qua tum in templis, tum in oratoriis ad res divinas uti solemus.

Mandata ad VOCIS URBIS administratorem (Romam, *via Alessandrina, 87*)  
mittantur, res praecise indicando, quas quisque sibi cupit. Gratuito sumptuum  
aestimatio fiet.

---

## SATURIO

---

Comoedia latinis versibus conscripta a clarissimo viro  
Ioanne Baptista Francesia et per Commentarii VOX URBIS  
paginas vulgata, in volumen redacta est, quod apud Com-  
mentarii eiusdem administratorem venale prostat lib. 1.

---

### IN LUDIS LITTERARUM OPTIMA TIRONIBUS SCENICE AGENDI EXERCITATIO.

---

De claris sodalibus provinciae Taurinensis Societatis Iesu commentarii conscripti  
et exornati a P. SALVATORE CASAGRANDI ex eadem provincia, ven. lib. 7  
beneficio *Missionum Montium Saxorum, Californiae et Alaskae S. I., VOX URBIS*  
Sociis pretio lib. 4,50 conceduntur.

Qui sibi eos cupiat, ab auctore requirat *Via Barbaroux, 28 — Torino.*

# VOX URBIS

DE LITTERIS ET BONIS ARTIBUS COMMENTARIUS

PRETUM SUBNOTATIONIS:  
In Italia: Lib. 4,80 — Ubique extra Itallam:  
Lib. 6,25, Doll. 1,25, Sch. 5, M. 5, Rubl. 3, Coron. 6,25

SEMEL IN MENSE PRODIT

POSSESSOR ET ADMINISTRATOR.  
ARISTIDES LEONORI, eques.  
ROMAE — Via Alessandrina, 87.

## EX GERMANIA

De catholicorum opera in re civili

**I**DIBUS Februariis anno M DCCC LXXIV Russelius, anglus nobilis vir, eiusque asseclae lutheranae sectae studiosissimi, Guilelmus I, Germanorum Caesar, ex animo gratulabantur, quod leges Maio mense anno antecedente in catholicorum universitatem contra eorum iura latas exequutioni mandare coepisset. Guilelmus autem libens respondebat bellum sese instauratum, quod iamdiu Germanici Caesares contra Romanam Sedem deduxissent, quae semper et ubique populorum bonum atque salutem praepedivisset, et victoriam speraturum qua lutheranae reformationis commoda rursus latiusque diffunderentur.

Triginta vero annis post, Guilelmus alter, nepos eius, e Vaticana arce redux, ubi Leonem XIII inviserat, inter cardinalium ac praesulum conventum, aiebat « vim non esse ad regendos populos satis: vim enim omnis auctoritatis in religione esse reconditam, qua depulsa, gentes et nationes facillime dilabi ».

Et plane: veteres Germaniae optimates omnes nullam esse posse Germaniam existimabant nisi lutheranam. Horum consilio servientes illam in catholicos persecutionem Caesar eiusque cancellarius Bismarck institerunt, quae *Kultur-Kampf* dicta fuit, atque legis rogationes proposuere, quibus clerus omnis catholicus reipublicae ditioni in omnibus subiiceretur. Has contra leges catholici, ac praesertim episcopi, vehementissimas protestationes edidere, atque actibus protestationes suas confirmantes, ad eligendos sibi proprios oratores populares quamplurimos omnem contulere manum. Quo conatu ita sapienter usi sunt, ut catholici oratores, qui nec sexaginta primum erant, anno M DCCC LXXXI fere in duplum excreverint.

Quia vero non catholici tantum hinc multiplicabantur, sed socialistarum haud minus inde factio crescebat, Bismarcius ipse ad hos coercendos catholicorum suffragia sibi ut faverent quaesivit. Ita ad compositionem ventum est et ad rogationes quae « pacis » dictae fuere, quibus septem annorum decursu omnes paullatim leges iamdiu in catholicos latae eversae sunt et abrogatae, restituta apud Pontificem Borussica legatio et inter Germaniam Hispaniamque obortae de Carolinis Insulis quaestionis compositio Leoni XIII uti arbitrio summo commissa.

Iure itaque legati municipum catholici hisce victoriis efferebantur, quae tamen Ludovico

Windthorst, eorum duci, satis ad diurnitatem visae non sunt.

Vir enim ingenio praeclarus, sed constantia maior, die XXIV mens. Octobris anno MDCCXC prope moriturus sodalitatem popularium Germanorum condebat (*Volksverein* Germanico sermone dicitur *für das katholische Deutschland*) ea nimis mente, ut omnes catholicorum vires una coniungerentur, ut novis novae aetatis necessitatibus serviret, ut socialistarum conatus, non vanis quaerimoniis, sed opera et labore repellerentur, ut quod aequum atque iustum illi postulasset una cum iis, at Christiano animo, expostularetur, ut cuiusque ordinis institutio christianis rudimentis perfunderetur, ut opificium commoda iuvarentur, ut denique iura adlaborantium defenderentur passim. Iubebat siquidem vir sapientissimus, animos omnium religionis communis esse cooptandos, at monebat simul omnia quae in bonum populi augendum procurantur, non esse nisi evangelico fonte deducta, ideoque oportere religionem christianam funditus atque iure suo populi curam gerere.


Quae ut consilia Germani catholici perficerent, miro ordine et mente prudentissima compositi sunt. Sodalitia enim condidere primum, quae tepidos ac negligentes cooptarent. Pro opificibus vespertinae aulae conductae, ubi colloquia invicem suis de commodis ac necessitatibus habere iis licet; popularia scrinia posita ac nummulariae mensae, ubi daretur agricolis opificibus pecuniam commodare absque usura; iurisperitorum positae sedes, qui opificibus praesto essent opera et consilio; sodalitates dominorum hinc, inde opificium conditae, ac, pro singulis artibus vel industriis, peculiaria sodalitia constituta, quibus una esset mens: « In rebus gerendis integer, in vita vivenda christianus » (1); agricolae ipsi pluribus sodalitiis copulati, et nummulariae mensae pro iis quoque conditae, quae, ruralium nomine, eorum commodis sufficerent.

Hoc modo, vix anno a fundatione exacto, centum sodalium millia iam in *Volksverein* societatem cooptati fuerant; modo vero quintuplicatus iam numerus est. Hi quidem sodales de societate universa in Christo instauranda optime meriti, comitia atque conciones habent, commentaria et diaria scribunt, bibliothecas ponunt, opuscula distribuunt, et christianos opifices in unum coactos omni ratione tuerunt. Quorum quidem sodalitia omni opera et constantia causam miserorum iuvant et provehunt, adserentes non omnia commoda esse a republica exspectanda, sed per se ipsos primum comparandam esse salutem.

(1) *Ehrlich im Handel, christlich im Wandel.*

Hisce conatibus et artibus Germanicae catholicorum factiones omnia quae favere miseris possent adiuvarunt alacres, sive de diurno labore ad octo tantum horas coactando, sive de constituendis opificum viduis bonis et praemiis, sive de protuenda operariorum vita, sive de feriali quiete iubenda ubique, sive de advigilando labore puerorum vel mulierum. Quae rogationes omnes quoties propositae sunt toties vindices atque fautores Germanicos nos sodales catholicos e populari factione invenere, et multiplicatos in dies, Windthorst illo et Lieber comite eius vita functis, ii qui iisdem successere, Bachem doctor, Schödler sacerdos, Trimborn populi orator, Spalm doctor aliique, invenient.

R. M.

DE RE LITTERARIA APUD SUBALPINOS<sup>(1)</sup>

## I.

## DE HISTORIA

**S**UBALPINI, quiescentibus rebus, post Gallorum dominatum, ad studium historiae patriae in primis se contulerunt, quibus libera penitus palaestra patescere videbatur. Hinc historiorum agmen, insita quadam nostrorum virtute, innumerabile exstitit. Sed ad illam historiae partem alacriori studio contendunt enucleandam, quae ad Subalpinas regiones potissimum pertinet, eorumque principes, quos adhuc, iniquo sane iudicio, seorsum optimae notae historici reliquerant. Et rex Carolus Albertus singulari studio ac benignitate hos ferre in oculis regaliter consuevit, eosque amplissimis perpetuisque honoribus decorare, qui res nostras ardenter inquirent atque in lucem vindicare niterentur. Sed horum ducem dicere haud dubitaverim *Aloysium Cibrario*.

Hic, humili loco natus, magno praeditus ingenio, sub doctore Amadeo Peyron, taurinensi eodemque exemplaris virtutis sacerdote, admirandus tenacitate voluntatis, citra invidiam ad summa regni munera pervenit. Namque, temporum opportunitatem arripiens, primus omnium, rerum reconditarum sagax et pertinax inquisitor, singulari diligentia, adsiduo labore, nulla difficultate deterritus, remotis patienter saeculorum tenebris, quibus passim res antiquitatis circumfusae etiamtum menti hominum obversabantur, eo contendit, ut perspicue primam Augustae domus Sabaudiae originem erueret

(1) Cfr. num. VII.

eamdemque italicam praeter dubium ostenderet. In his enim votis, in hisce desideriis totus fuit.

Et quamvis multis reipublicae negotiis esset implicitus, maiorem tamen vitae partem in antiquis rerum memorias detegendis impense transegit; atque e bibliothecis et e reconditis coenobiis, ubi multa notitiarum congeries iamdiu ignorata latebat, incredibilia prope testimonia in lucem primum reduxit atque in doctorum commodum derivavit. In ipso enim omnes facile admirabantur ingenium aceratum, laboris patiens, perspicuum, quae denique sunt optimi cuiusque historici virtutes. Haec omnia una simul feliciter coniuncta reperies.

Quo nomine, Carolo Alberto regi, qui viorum ingenia in primis alebat fovebatque, carus acceptusque vixit. Eius quoque suasum, quamvis ad altissimas regni dignitates esset advectus, ab incepto historici munere numquam recessit. Quamobrem aulicis honoribus auctus, ita se Principi probavit, ut inter nobiles adlegeretur, et maioribus Ordinis Mauritaniani insignibus donatus, et in electissimos doctorum coetus per Europam cooptatus, inter sodales denique adnumeraretur taurinenses doctrinae finibus proferendis, Ordinisque Sabaudiae ob merita civilia.

Ipse enim scripturus de regibus Sabauidis primus adgressus est feliciter quaestionem, quae iamdiu doctos homines torquebat de Augusta domus origine. Namque quum complures hac de re eademque discrepantes sententiae essent prolatae, illorum opinio ei maxime probatur, qui contendunt Humbertum I, cui fuit nomen inditum *Bianca Mano*, quem certissima documenta Allobrogiorum principum progenitorem adtestantur, adnumerandum proceribus esse, qui vivo etiam Rodulpho, Burgundiae rege, herili imperio aliquot provincias obtinuerat. Hic Othonis Guillelmi filius, Adalberti nepos, Italiae regis, post Rodulphi excessum Vallem Maurianam apud Allobroges aliaque circum loca in ditione habuit; neque solum bellica virtute, sed iustitia, pietate et munifica in sacras aedes liberalitate praesertim enuit.

Quae quidem quum primum praeter omnium opinionem, veluti e communi rerum naufragio iterum in hominum memoriam sunt prolata, omnibus historiae cultoribus maxime probantur, et regi in primis, qui nihil carius, nihil antiquius habebat quam ut italicica cognoscere tur atavorum suorum origo.

Haec autem opinio, ut hic obiter dicam, in universum tradita, placuit, et multis praeterea acerrimisque novis argumentis e documentis rerum antiquarum in lucem editis, etiam atque etiam comprobata, ab omnibus postea scriptoribus citra invidiam in vulgus editur atque laudibus accipitur. Quo facto, inter eius praeclarissima opera, principem locum obtinuisse nemo dicere dubitavit *Historiam Augustae Domus Sabaudiae*, quae subito in honore habita multis et perpetuis laudibus exornatur.

Exaravit deinde *Historiam Augustae Taurinorum*, eo mentis acumine eaque dictionis elegantia, ut inter adprobatisimos scriptores omnium sententia adnumeraretur.

Eodem ingenio et patientia amplam historiam Urbis Cherii in vulgus edidit, quae olim fuerat in subalpinis floridissima respublica et multis viris et egregiis virtutibus enituerat. Haec a Friderico Aenobarbo hostili animo incensa atque ad ultimas redacta, mirum in modum ad pristinam gloriam revixit.

Complura alia praeterea descripsit Cibrarius, et mira admodum facundia ac celeritate, sed nobili semper in omnibus elocutione atque elegantia. Sed quum diu supremus rei litterariae moderator fuisset, et deinde rationes regni externas cum decore vel in difficillimis reipublicae temporibus, gessisset, se quasi medium ferens, nil improbandum fere produxit.

Etiamtum adolescens atque ingenio nimis indulgens, ab illis quoque scriptiunculis minime abstinuit, quas recentiores *Novelle* appellant, in quibus maxime mentis viget atque excogitandi vis. Ad fabulas milesias proprius accedunt, etiamsi veritatem quamdam prae se referre videantur. Eius narrationes omnes sermonis elegantia nitent, et nihil ipsis perfectius, nihil iucundius.

Quamobrem eis recte adiudicaveris aptandum esse illud Vergilii:

*Si canimus sylvas, sylvae sint consule dignae!*

Ipse vero, quod paulo ante diximus, quum vitam potissimum egisset quo tempore apud nos laus erat et honor rebus novis inservire, religionem sanctam adgredi, iura Ecclesiae audacius, herili imperio fretos, scriptis carpere, vel ipsam Pontificis Maximi auctoritatem in dubium revocare, nihil omnino hac in re vel putidius vel quid noxii protulit. Quae autem publica uti administer imprudenter, vel ex tempore locutus adseruit apud populares oratores vel apud senatores, aut demum auctoritate sua facilis approbavit legibus Ecclesiae pugnantia, libero ore moriturus, veniam demisse repetens, ultro refutavit.

Extremo suo tempore, labante in dies valentidine, diurnis doloribus afflictatus, quum aequo animo ad ultimam senectutem pervenisset, laetus, omnia fausta suis adprecatus, ad caelestes advolavit kal. octobribus MDCCCLXX.

(Ad proximum numerum).

SUBALPINUS.

### An aliquo modo Dionysii rhetorica defendi possit

**E**x iis quae in superioribus numeris disputavi dixerit quis paulo me asperiore sententia in Dionysium inquisisse, magisque eum reprehendendi studio quam laudandi indulsisse.

Oportet vero praecipere – ne ita possit de me existimari – his rebus nec in eorum sententiam descendere voluisse, qui nasute dionysianam historiam destringant, neque illis adstipulari omnino, qui summis laudibus rerum scriptorem conentur effere.

Nam, si magis offendit nimium quam parum, iam patet per se quam longe afuerint a modo qui, praeindicata quadam opinione, de Dionysio disseruerint, eumque historiam scripsisse

affirmaverint non ut « hominem civilem », non ut « auctorem pragmaticum », sed « plane ut professorem, h. e. ludimagistrum », aut egregie concinnasse cum eruditione mentisque acie dixerint, quaecumque crimina in ipsum adversarii coniecerint diluere studentes. E contrario, per medium imus, ut dici solet, aliquid concedentes, aliquid non probantes, quum rectius sit omnibus in rebus uti moderatione. Quibus praemissis, an aliquo modo Dionysii rhetorica defendi possit, experiamur.



Haud dubium est – ut rem altius repetamus – quin plurimis *Antiquitatum Romanarum* locis Dionysius rhetorica usus sit, quippe quum nimis in eius studium incubuerit, minimeque seiungi potuerit.

Vidimus iam, in operis contextu, verborum redundantiam sive effusum orationis genus, drossum frequentiam, sermonis flosculos, comparationum consuetudinem. Dionysiana autem narrationis formam cum illo incitatiore amni non dubitavimus conferre qui, nullo aggere tentus, super ripas effunditur, quaeque sunt ima non sinit cerni, suoque cursu lutulento involvit omnia. Diximus etiam redundantiam eius nonnullos ex asiatico dicendi genere profectam existimasse, floribusque superbe frondescientibus aequasque qui tenerum obtegant folliculum eos involventem, quosque si comprimas, inferiores quidem specie admiratus agnitus sis. At hic discrimine opus est: quae per se paupertat vitia, omniumque ob oculos versentur, non adducimus in dubitationem. Cui enim probatur illud dicendi genus turgidum, quod satietatem quamdam in lectorem necesse est inducat?

Fuerunt vero, omni quaque aetate, qui nimis huic ingenio indulsissent, quum insitum sit paene omnibus inflatius perscribendi studium; at hi merito paullo post contemti atque abiecti iacuere! Saepe accedit etiam ut in scriptis perpendidis, ingenii praesertim venditandi causa, quae desint omnino aestimatores quidam cupiant detegere; exinde conatus innumerabiles quid cogitaverit scriptor perscrutandi, frigidum acumen, iactura temporis, mentis effusio...

Quae res in Dionysio inspicitur, ne a meo proposito egrediar. Constat enim prioris aetatis homines eius libros in summis deliciis habuisse et quamplurimi aestimasse; nostrae autem viros doctos permultum a nimia illa admiratione recessisse multisque conatibus detexisse in quae dicendi vitia Dionysius incidenteret, quid e rhetorica sibi adsciseret, quibus ineptiis aditum daret, tamquam si e. gr. archaeologia nullius esset momenti ad rerum generum notitiam augendam, et in his morari cavillationibus quam cetera, immo vero potiora, perpendere, praestaret!

At ego in adversa sum opinione: De *Romanis Antiquitatibus* disputans, cuvis in promptu esse officii duco, dionysianorum studiorum rationem hoc ferre, ut historiae quoque confectio rhetoricae gradatim redoleat; quemadmodum quivis poeta, etiam si soluta loquatur oratione, poetarum quam oratorum similiorem eam reddit necesse est! Compertum enim habeo nimiam illum impendisse operam in rhetoricae

studium, quippe qui plura in hac scripsit disciplina eaque vel maxime quae legerentur digna et omni eruditio genere abundantia, validisque viribus controversiam inter duas oratorum et rhetorum factiones, e Ciceronis tempore ad suam quoque aetatem perseverantes, participasset. Erant qui ad Aristotelis praecpta potissimum se conformarent ac veterum atticorum oratorum rationem studerent revocare; alii autem, in elocutionis gratia maxime versati, asiaticum dicendi genus, rerum accurate cognitione et philosophiae disciplina destinatum, amplectebantur.

Dionysius arbiter stetit, ac praecepsit, exemplis, quid de vi et natura eloquentiae sentiret enixe ostendit, animique plenus nullo affirmavit negotio oratoris esse rem publicam gerere, concordiam in ea servare, virtutes commendare, prosperitatem fovere! Quin etiam, institutionem oratoriam culmen quasi doctrinarum omnium habuit ac, tali imbutus principio, cuique ausus est aptare disciplinae!

Praeterea, haud omittendum censeo, Dionysii e sententia, historiam φιλοσοφίαν ἐν παραδειγμάτων definiri posse, quum eius sit docere per exempla.... Quid igitur? Si id est historiae munus tribuendum, nemo ambigit profecto, quo consilio eam honestati et voluptati servire voluerit ille, quanamve ratione hac steterit lege. Omnia enim quae ad hominum vitam moresque pertinent, ad historiam referre optimum ratus est. Hinc orationum frequentia, hinc illas diligenter conquirendi norma rebusque propositis, temporibus, oratorum et auditorum ingenii accommodandi.....



Quum adeo mutata sint nostrae aetatis iudicia, ut, quod prius probaretur atque haberetur pluris, vix nunc perferri possit et saepe in contemplationem adducatur, facile potest percipi eur historiarum orationes, perfuse adhibitae, sint nobis offensioni. Alind enim exoptimus, investigationis aciem, veritatis et integritatis studium, ut haec prae ceteris nominemus. At illis temporibus longe aliter res erat: Herodotus, Thucydides, Xenophon iam hoc suo exemplo confirmaverant, quum historiis orationes quamplurimas inseruissent.

Quid mirum igitur, si Dionysius eos imitatus sit, quem magnopere conatum esse puto ut ceteris rerum scriptoribus praestaret, quaeque bona peperisset antiquitas, renovaret?

Quin immo, in hoc conatu, nulli pepercit labori ut accurate perpendret quae ab aliis essent scripta, ideoque saepe in auctorum orationes inventus est, quippe quum non suis principiis stetisse viderentur. Nam si orationes eorum qui loquuntur vitae moribusque aptandae sunt, Thucydides et Xenophon merito vituperantur ab illo, quum hanc legem plerumque perfrerint.

Dicat quispiam - cui adstipular libenter - longius processisse Dionysium, nimio edocendi vel potius philosophandi ductum studio, modo meminerit qualis sit consuetudinis vis quantumve in hisce rebus artis usui ac temporum novitati tribuendum! Ad hoc non possum quin opportuna Schuliniana verba referam, quam-

quam non prorsus cum auctore convenio: « Quo enim tempore Dionysius Romae fuit, libertas populi romani nondum prorsus extincta erat; comitia et senatus ab oratoribus regebantur; historiarum igitur scriptori id praecipue spectandum erat, ut etiam qui civili orationi in eum fermentum aliquam ex opere suo capere possent. Adde quod Dionysius Romae artem oratoriam docuit ideoque neminem magis quam ipsum, in historia orationum bene elaboratarum atque forensi usui accommodatarum specimina proponere decuit » (1).



Restat nunc ut quid de aliis digressibus existimandum sit persolvamus.

Praetereo silentio frequentes urbium situs et caeli descriptiones, eaque omnia ad iuris romani notitiam pertinentia, in quibus viderit quisque ut sua fert opinio, et ad illas venio comparationes, quas Dionysius suo operi inserit.

Diximus iam in antiquorum reipublicae temporum cum recentiore rerum statu Dionysium delectari comparatione, et saepe iracundia inflammari, quum condicionum discribina perpenditer.

Hanc, ut ita dicam, consuetudinem, non defuerunt qui ad rhetoricae revocarent, vel potius in ineptias adscriberent; quod non omnino probatur mihi. Nam, si tali studio Halicarnassensis scriptor inservit, suae aetatis mores in medium proponendo deque miseriis ac corruptela deplorando, dum antiqua landat instituta veterumque rerum gestarum narrationem pergit, nulla paene voluptate ductus, sed quadam necessitate coactus in hoc evigilat. Quod si rhetoricae pigmentum detegi velit, bene potest in dicendi genere, non in animo reperiri. Sunt enim cuique mos perpendendi et disceptandi casus eventusque rerum, hoc uno interposito intervallo, ut quisque sine ingenio ac sine litteris ea tantum attingat, quae sibi ob oculos versentur, quum qui aerioris subtiliorisque sit consilii, penitus inspiciat, in causas inquirat, per comparationes procedat, iudicium exemplis confirmet. Quod autem sentiat scriptor, vix effici potest quin passim immisceatur operi.

Ceterum, unusquisque nostrum sentit idem! Scimus id praecipue in historia scribenda spectandum esse Dionysium dixisse, ut ea patriae laudes celebrantur amplificenturque, et legendum honestati voluptatique consulatur. Id sentiens, poteratne fieri ut aequo animo de iis rebus cogitaret suo consilio obstantibus, qui optimo ea lege videretur stetisse? Minime quidem, si parumper consideremus quanto in amore iustitia et probitas Dionysio fuerit! Nonne igitur necesse fuit illi de mutatis rebus, verborum libertate quadam, vehementer queri? Quid amplius?

Si « scriptor noster, - ut ait Weismannus -, cum iis sensit civibus qui pristinum reipublicae statum quo restricta plebis insanientis licentia senatui summa imperii commissa erat,

(1) V. FRID. SCHULIN, *De D. H. historicō praecipuo historiae turis romani fonte*. Heidelbergae, MDCCXX, typis Ioann. Gutmanni.

nuper periisse misere lugebant », iam in aperto est haud aliter Dionysium agere posse.

Uno allato exemplo, in quo magis hoc emergat, videamus:

In libro IV *Romanarum Antiquitatum*, cap. XXII, is, incidens in errorem, Servium Tullium tradit omnes servos, qui libertate donati essent, in civitatem recepisse, occasionemque arripit disserendi in quam suis temporibus insaniam venissent isti, quaque facultate in libertatem a dominis assererentur. Queritur autem adeo mutatas esse res, ut priscae Romanorum virtutes pro nihilo habeantur, quum hoc comparatum sit ut ad dignitatem producantur quos dominorum levitas vel insolentia gloriae redemerit, censureisque summopere deprecatur ne legum neglegentiam diutius perferant.

Atqui hunc, si licet dicere digressum, quem potius pro re locum allatum putem, in ineptias nonnulli adscripserunt! Sit sane motus animi, iracundiae quidam aestus; verum enim vero ad rhetoricae revocari non potest.... Quam in sententiam, ni fallor, doctus et intellegens rerum aestimator Pais fere descendit, qui, dum subtiliter animadvertisit Dionysium in amicitia cum Aelio Tuberone fuisse, ad quem de Thucydide scriptore librum exaravisset, suamque in mores perditos effusisse iram, propterea quod tempus actum patronus laudaret, litterarum iurisque civilis studio deditus ac veritatis amans; accuratius percenseri oportere quos huiusmodi locos Niese aliique existimantes « inanes » dijudicaverint praecipit (1).

Pari modo statuendum censeo de obiurationibus in immoderatam divitiarum cupiditatem, in languescentem deorum cultum, in virtutum contemplationem, in iurisiurandi negligenciam, in rerum perturbationem, in luxuriam, in ea tandem vitia, quae rem publicam funditus trahunt civiumque saluti magno sunt detimento.

Quod si Dionysius fuit erga deos pius homo sanctusque - hoc autem collegimus tum ex iis quae ipse sibi proposita ostendit, tum quae in aliis laudat vituperative - viris natu maioribus obsequens, patriae amans, temperans, iustus, veritatis aequitatisque studiosus, nullo malignitatis crimine contaminatus; si virtutis ad normam vitam suam direxit; haud dubium est quin bene de hac re senserim.

Meo quodam opusculo de sensu naturae in epistolarum plinianarum libris, quod superioribus annis edidi, illa Valmaggii verba ad me sevocabam, in quibus egregie assereret auctor, « religiosum quasi rhetoricae studium humano generi esse insitum, semper, omni tempore, quacumque litterarum condicione ».

Eadem verba hic quoque possum afferre, quum magni mihi videantur, ut aequiores Dionysio existimantes se praebant.

Scrib. Salerni, mense Iunio a. M DCCCCVII.

M. GALDI.

(1) V. PAIS, *Dionigi d'Aticarnasso e la legge Actia Sentia*. Nota letta alla R. Acc. di Arch., Lettere e Belle arti, Toronata del 30 maggio 1904. Napoli, Tip. della R. Università.



## VOX URBIS PALAESTRA

Philosophus et Orator  
quo modo sese habeant ad invicem

**Q**UUM nostra sententia totum veluti doctrinæ patrimonium inter oratorem divisum sit et philosophum, videamus paululum, si placet, qua ratione hi sese habeant ad invicem.

Et nos quidem oratorem hoc loco non eum solum usurpamus, qui ad Tullii praeceptum sapienter possit ornateque dicere, sed etiam qui eadem ratione scribere: eum nempe quem litteratum hominem vulgo dicimus.

Is igitur non uno modo a philosopho discrepat, cuius proprium est munus invenire veritatem, oratoris referre et nunciare inventam. Qui solum philosophum agit gravis semper est, viae et rationi in omnibus studet, cuncta ad exactissimam revocat rationis trutinam. Orator contra aliis, quam ratione, viis atque modis sese animis insinuat, ac mentes furtim quodammodo subire contendit: rerum verborumque lenociniis adlicere, persuadere potius quam argumentis vincere, animorum motus concitare, affectibus blandiri, curiosum et vividum ingenium amare, pulcris ac scitu iucundis rebus magis quam nudae studere veritati. Philosophus vel cum Pythagora antro sese abdere vel Accademo cum Platone: orator vero in publicum prodire, in foro, in athenaeo, in lyceo versari. Ad haec orator omnem suam doctrinae veluti supellectilem a philosopho mutuatur, quam tamen confessim suam facit, eamque mentis sua quasi colore tintet atque odore conspersam ceteris exhibit. Ita quamvis non omnis sit philosophus orator, orator tamen est nullus quem iniuria philosophum dixeris, quod veritatem a philosopho inventam ita mente animoque completitur suo, ut ea novam eamque splendidam formam induisse videatur.

Itaque sic teneamus: oratorem non minus quam philosophum adamare consectarique veritatem: utrumque tamen diverso quodam modo: hunc veritatem ut inveniat, illum ut demonstret vulgetque inventam.

GREGORIUS CLEARY  
ex Urbano athenaeo Leoniano.

PAPYRI  
UNDE ET QUOMODO ERUANTUR

**O**PIMIS maxime e thesauris, quibus antiquitatis doctrina ditatur, principem locum Aegyptios certum est obtinere papyros; idque tum rebus quas continent, tum antiquitate sua. Verumtamen eorum inquisitio admodum impervia plerumque maximisque ducenda cautelis. Nimis enim periculosum est eos ab Aegyptiis incolis querere, qui plerumque falsos effingunt, et mentita voce ut vetustissimos venundant. Nonnunquam autem, ut de veteribus

nummis fieri saepe apud nostros audimus, ita ibi de papyris, quos nuperrime sua manu effectos et conscriptos ad tempus, veterum inter ruinas urbium ipsi sepelunt, ut obstupente coram viatore effodian.

Quamobrem antiquitatum viri studiosi Aegyptias terras qui lustrant haud multam fidem tribuendam papyris huiusmodi docent, plerique licet papyri revera inter ruinas veterum urbium effodian, ut contigit Dimeh in oppido, Meridis lacus ad septemtrionale litus positio. Quae florebat eo in loco civitas tertio post Chri-

prope urbes videre est ac scebach nomine incolae hodie vocant. Qui saepe colles magnam nonnunquam altitudinem attingunt. Suorum enim omnium domuum immunditias unum in locum Aegyptii deponere ita assueverunt, ut, decurrentibus annis, ad multam saepe congeriem cumuli exereverint. Itaque Medinet-El-Fajum ad oppidum viginti passuum ad altitudinem collis huiusmodi extollitur; Cairo vero ad urbem septuaginta. Nam quo magis frequens erat in urbe civium multitudo, eo citius altiusque immundus acervus angebatur. Immundis vero hisce ex fodinis Aegyptiae antiquitatis mirae reliquiae eductae sunt, quae Berolinensis modo et Vindobonensis et Genvensis musaea complent.

Sed non ante trigesimum a nobis annum inita res; nam quum saccari frumentos coli per Aegyptios agros cooperunt, agricolae eos per colles optimum sibi simum paratum rati, ad eos effodiendos ligones admovere. Cultu igitur saccarino sacrae antiquitatis investigationes inopinato aluntur; papyri eos per cumulos inventi certatim empti sunt. Interdum vero mala lueri cupiditate et in fragmenta discissi, ut pluribus emptoribus satisficeret. Quamobrem foederis eiusdam nuptialis charta tripartita nunc nobis tria per loca Oxfordii, Genevae, Monachique prostat.

Hisce periculis ut occurrerent, ipsi antiquitatum cultores sibi modo ausum assumpsere atque ad eos colles effodiendos ipsi effossores conduxere; ut Grenfellius atque Hunt Angli, ut Wilcken, Germanus, alter per alti Aegypti loca, hic Esnae ad urbem fecere. Wilkeni tamen navis Amburgum prope portum igne adusta, doctissimi viri fere vanos labores diuturnos reddidit.



Cathedral templum in urbe Intemelio.

stum saeculo ab incolis omnibus extemplo deserta est. Eius autem domus, mirum sane, nemo depopulatus est, ita plane ut obducta, ventis paullatim deserti arena eas intactas obruerit vetustaeque humanitatis, linteo veluti suo, vestigia ad nos usque integra servaverit.

Ingens inde papyrorum thesaurus eins per ruinas oppidi repertus est. Sed et alibi, ubique veterum Aegyptiorum innotuere ruinae, recondita papyrorum messis habebatur. Quum tamen veteribus ruinis superexstructae recens domus fuere, haud parvi pretii hodie est eas emere ad diruendum. Quamquam regulus ille Mehemet Ali paucis abhinc annis edito decreto oppida saepe ex integro, decem vix obolis singulas domus emens, solo aequavit.

Nec tamen gravi forte pretio Meuscè regionis agricolae agros suos omnes, cucurbitarum cultui traditos, locare effossoribus hodie consentiunt ad papyrorum inquisitionem per Ptolemaidis ruinas, quas suo illi cultu obruant.

Ditissimi tamen papyrorum acervi iis in collibus sive tumulis abundunt, quos Aegyptias

Sed et per vetusta sepulera papyri facilime inveniuntur; mos enim erat Aegyptiis propinquos suos una cum carissimis supellectilibus sepelire. Itaque Timothaei Milesii poetae hymnus de victoria ad Salaminam, Abusirum ad oppidum, Ghisè prope pyramides, repertus est. Qui quidem maximi pretii papyrus habetur, quum Graecorum poeseos, post Pyndarum atque Bacchilidem, quae fuerint incolae nos docuerit.

Alii autem papyri, numero etiam ingentes, habentur ex cadaverum illis involueris sive thecis, quae in humani corporis figuram ex spissiori charta Aegyptii effingebant. Charta enim illa multis saepe veteribus foliis in unum compressis formata est.

Quare anno MDCCXC Flinley Petrie, Germanus doctor, multos ex iis involucris emit, Berolinumque misit, ubi multa cum patientia disiectis singulis foliolis, multa apparuerunt vestigia veterum scriptorum insignia *Antiopis Euripideae* paginae adhuc ignotae atque *Fedonis διαλόγου* fragmenta, satis Platoni proxima. Ita factum est ut anno MCM Grenfellius atque

Huntius, quos iam laudavimus, Fajum in regione meridiana per necropolim effossiones duxere, multaque ibi chartacea feretra inveniunt, ex quibus vetustissima documenta eruer, ad aetatem praesertim Ptolemaei ειεργήτου pertinencia, cui Phiscon cognomen fuit.

Quanti denique sint habendi papyri in Graecorum antiquitatis studiis provehendis, post hactenus dicta nemo est qui non apte existimet.

### DE DUOBUS ANTIQUIS TEMPLIS IN URBE INTEMELIO

**T**EMPLUM episcopale Intemelii (*Ventimiglia*) inter vetustiora Ligurum monumenta merito adnumeratur. Ruderibus enim fani *Iunoni regiae* olim dicati, ut videre est in lapide, qui adhuc in Cathedrali prostat, exstructa fuit antiquissima aedes B. Mariae <sup>URBIS</sup> sacra, cuius reliquiae presbyterii fundamentum effodientibus patuerunt anno MDCCCLXXVII. Saeculo XII templum instauratum et ampliatum fuit ad normam *styli* ut dicitur *byzantini-romanicus*; cui dein sequenti saeculo vestibulum appositum fuit *stylum gothicum* referens. Ad formam basilicae exstructum aedificium, et superioris aetatis inscripta plures deformatum, nuper ad praescriptum Eduardi Mellae comitis vercellensis in pristinam formam restitutum est anno MDCCCLXXVII. Centum et amplius numerantur episcopi, qui per christiani aevi decursum templo in hoc sacra operati sunt, inter quos IV cardinales; nec tacendum Romanos Pontifices quatuor, variis temporibus per Liguriam transeuntes, templum hoc sua praesentia decoravisse.

Templum alterum, quod intra urbis moenia archangelo Michaeli sacrum adhuc inspicitur, traditur olim fanum exstisso Castori et Pollici dicatum. Nudis et rudibus lapidibus interiori fabricatum, etiamnunc mediae aetatis incipientis ruditatem omnino refert. Cryptam habet, quam columnae romanum ad tempus pertinentes sustentant. Sodales *benedictini* remotis temporibus ad templum hoc claustra extruxerant; et aedem hanc tamquam propriam habuerunt, cui non haud recens frons externa aedificata fuit aedificii formae respondens, instante Hieronymo Rossi equite torquato, viro de patriae et Ligurum historiis quam maxime merito.

CALLISTUS AMALBERTI  
in Ventimilien sem. doctor.

*Re fruere, ut natus mortalis; dilige sed rem  
Tamquam immortalis: sors est in utroque verenda.*

AUSONIUS.

*Sed neque tam facilis res ulla est, quin ea primum  
Difficilis magis ad credendum constet.*

LUCRET., *De nat. rerum*, II.

### HORAE SUBSECIVAE

#### Ugolini Della Gherardesca Comitis mors

(E DANTIS ALLIGHERII *Infer.* c. XXXIII)<sup>(1)</sup>

*Perfidus hic foedo dentes contraxit ab esu,  
Tersit et atraxis ora cruenta comis.  
Mox ait: "Infandum vis me renovare dolorem,  
Talia versantem, qui premit usque animum.  
Quem nunc dente voro, prodam si voce videbis  
Me simul in mediis flere, dolere sonis.  
Nescio qui venias, quoque huc errore viarum;  
Sed civem Florae vox sonat una meae.  
Ugolinus ego: quondam comes inclitus; at cur  
Aversa hic subdit fronte Rogerus, habe.  
Non opus hic, hospes, faris qua perfidus arte  
Verterit in nostrum vincula necemque caput.*

*(Sic dolor intus agit) palmas ulrasque momordi;*

*Rem pueri aduentum, consillumque dabant;*

*Pascere iam genitor (minor est inturia) nostris*

*Artibus; absumes munera parta plus.*

*Talia clamantes veritus, gemitaque dolentes,*

*Morsibus abstinal, continuaque manus.*

*Hinc binos tacuisse dies dolor impunit. Eheu!*

*Quidni sunt duri viscera aperta soli?*

*Quarlaque lux aderat; Gaddus: - Succurre - rogabat -*

*O pater! - et patrios corruit ante pedes.*

*Corruvit ante pedes, animamque efflavit in auras;*

*Sic sunt infanda pignora adempta neco.*

*Quare amens feror huc per amata cadavera et illuc,*


*Ternos perque dies nomine quemque suo*

*Compellabam ultra; donec mihi saevior ipsis*

*Funeribus vitam sustulit alia fames..*

*Vix ea fatus erat, canis instar, lumine torvo*

*Semesa arripiens tempora dente vorat....*



#### PHILANDRI BAVARI

#### DE AQUA DISPUTATIO (1)

— Nunc, — inquam, — ad physicum aliquem vos adducam, qui de aquae usu vos imbuat, sicut eius postulat ars. Qui primum quidem aquae pondus, tum vaporis vobis vim ostendet. Iamendum vos scitis, quis sit in mercatura metiendi modus, grammata, chilogrammata novistis. Quid adduxit homines ad istud pondus? Aqua. Chilogramma nominaverunt Parisiis viri in arte physica illustres eum pressum, quo gravatur solum decimetro aquae cubico eo tempore, quo aquae est summa compactio, quum videlicet quatuor est caloris graduum. Chilogrammatis pars millesima est gramma. Hoe aquae pondus movet molarum rotas, hoc portat in fluminibus et in mari navium corpora.

Et quid dicam de vi vaporis? Quae, quum esset in usum hominum introducta, adeo pererebruit, ut iam nullum posse maius iter sine ea suscipi credamus. Aquae enim subiicimus ignem, cuius ardore in vaporem dissociatur aqua, quem cum oculis videre non possimus, minui aquae copiam tantam animadvertis. Multo autem amplius occupat spatium vapor quam aqua; ideo via, qua potest breviore, emanat, quam, si claudimus, sibi ipse aperit. Haud ergo vim tubo perducimus ad embolum cylindri mobilem, quem suo appulso protrudit. Qui dum promovet vapor i viam ex altera parte aperit ipse, obstructa priore; itaque repellitur eo unde venerat. Qui quidem motus continuus rotis transmittitur vehiculi, quod cum paucis vel multis curribus sibi adnexis, per ferream viam, qua leniatur rotarum tritus, abripitur. Sed paucis haec erant perstringenda, quod brevi ipsi audietis in schola, et quod melius pictis figuris intelligetis, quo quaeque loco constituantur et quo moveantur machinae totius membra. Iam vero suspicamini esse multum

(1) Cfr. num. sup.



Templum S. Michaelis in urbe Intemelio.

*Quod latet, hoc referam; sceleratum crimine ab uno,  
Et vitae noscere impia fata meae.  
Qua famis atra patent angusto limina hiatu  
Ter Phoeben tardos vidi ego ducere equos.  
Ecce autem horrendae per dira silentia noctis  
Ante oculos rerum tristis imago stetit.  
Qua lucam Pisasque inter mons eminet, illuc  
Visus hic infesta signa movere fide,  
Gualandasque acies, Lanfranchiadasque catervas;  
Cum catulisque lupum visae agitare canes:  
Morsibus ac tandem cursu et formidine anhelos  
Cum natis miserum dilacerare patrem.  
Excutor somno, atque arrectis auribus adsto:  
Heu flent, et quaerunt pignora: Panis ubi est?  
Quid moveat, nostro nisi iam moveare periclo?  
Quod prope, quod summum prescia corda vident?  
Tempus erat modico curandi corpora victu,  
Sed mala quemque metu somnia sollicitant.  
Sub pedibusque meis admoti stridere vectes;  
Ostiaque horrifico murmure clausa premi.  
Obrigui; natosque simul sine voce tuentem,  
Me furor a lacrymis continuitque stupor.  
Pallida sed fletu largo pueri ora rigabant;  
Quorum unus: - Miseris quid, pater, instat? - ait.  
Non tamen interea lacrymas vocemque ciebam:  
Sic lucis, mihi sic tempora noctis eunt.  
Rurus ut ante oculos sublustra turris in umbra  
Natorum facies, patris imago, fuit;*

(1) Versio ineerti auctoris, quam ultro ad nos misit socius clarissimus Salvator Casagrandi e S. I.

calorem in vapore, quum sit aqua igni cocta atque expulsa. Quem calorem per domicilia perducere possumus ad frigora hieme frangenda, quod ego scio patrem tuum, Laurenti, domi suae instruxisse.

— Verum est, quod dicas — ille — esse quidem salubrem calefactionem, sed suptuosissimam saepe a patre nostro audivimus.

Cui ego: — Non mirum hoc est, Laurenti; rei enim utilitati conveniat oportet pretium.

Qui ridens: — Tu iam perge — inquit.

— Quid? Num alia vis audire? Me ineptum, ut desistam persequi, non potius monetis?

Ad hoc Stephanus: — Exprome reliqua; avemus audire.

Et ego: — Quia me cogitis habete, quae meteorologi de aqua dicunt. Haec sunt et iucundiora auditu et intellectu faciliora, quia ante oculos sunt omnia. Integra mehercule res non est tam remota, quam ipsum nomen. Est autem meteorologia, si verbi, quod Aristoteles invenit, notionem disiungimus, scientia earum rerum, quae supra terram, vel quae  $\mu\sigma\tau\zeta\tau\zeta\delta\varphi\eta$  sunt, aer et quae continent, quo terra circumvolvit. Nam est quidem, ut supra dixi, aer nitragenium oxygenio admixtum, sed continet praeterea plus minusve vaporis, acidi carbonici, aliorum corporum. De vapore nos videbimus. Qui, si adest copiosior — semper autem adest — nubibus caelum tegitur, ut saepe, nec est ad ambulandum ea, quae hodie fuit, serenitas. Nubes autem observantur rationibus diversis a nautis, ab agricolis, a viatoribus, a meteorologis. Nunc ad rem ipsam veniamus. Unde est illa, quae est in aere aqua? A terra, unde in vaporem continuo transformata surgit. Aeris autem partes, quae propius ad terram approxinquant, calidiores sunt: nam solis radii a terra reflexi in aera, huic calorem immittunt. Quod autem nunc leviores sunt, summa loca petunt, frigidiores partes deorsum labuntur, ut calefactae atque vapore refertae postea ascendat. Ita quidem facile videtis multam aquam posse efferri. Superius autem caelum est frigidius; frigidus autem aer tam multum vaporis retinere non potest, quam calidus; emitit ergo id quod ferre non potest in pulveris particulas minutissimas, quibus aer semper est repletus, a vento ex terra exagitatis. Hunc in modum innumerabiles nascuntur guttulae, quae quum in alto caelo collectae sunt, vocantur nubes. Quarum vero ipsi videtis esse elatiores alias, alias terrae proximas, ut nunc decem chilometrorum, nunc ne unius quidem metri spatium inter terram et nubem relinquatur.

Tum Stephanus: — Vellem profecto videre nubem tam humilem.

— At tu, — inquam, — saepe ambulabas in nubibus, autumno praelestum.

Ille: — Non ego memini.

— Ut statim tuae cupiditati satisfaciam, nebula, quae aliquando cubat in terra solo nomine differt a nubibus. Eadem est originis ratio. Si enim nocturna frigora tam sunt magna, ut ascendens ex solo vapor satis prope terram tepescat, ibi guttulae tenues oriuntur, quarum collectio tum nebula est. Guttulae autem vitae non quiescent, sed unis calore solutis aliae lignuntur et laevissimo vento agitantur.

(Ad proximum numerum).

## ACTA PONTIFICIA

Decretum SS.mi per S. Congregationem Concilii Tridentinis decretis interpretandis vulgatum circa regulas celebrandi matrimonium.

Ne temere inirentur clandestina coniugia, quae Dei Ecclesia iustissimis de causis semper detestata est atque prohibuit, provide cavit Tridentinum Concilium, cap. I, Sess. XXIV de reform. matrim. edicens: « Qui aliter quam praesente parocho vel alio sacerdote de ipsis parochi seu Ordinarii licentia et duobus vel tribus testibus matrimonium contrahere atten- tabunt, eos Sancta Synodus ad sic contrahendendum omnino inhabiles reddit, et huiusmodi contractus irritos et nullos esse decernit ».

Sed cum idem Sacrum Concilium praecepisset, ut tale decretum publicaretur in singulis paroeciis, nec vim haberet nisi iis in locis ubi esset promulgatum; accedit ut plura loca, in quibus publicatio illa facta non fuit, beneficio tridentinae legis caruerint, hodieque careant, et haesitationibus atque incommodis veteris disciplinae adhuc obnoxia maneant.

Verum nec ubi viguit nova lex, sublata est omnis difficultas. Saepe namque gravis exstitit dubitatio in decernenda persona parochi, quo praesente matrimonium sit contrahendum. Statuit quidem canonica disciplina, proprium parochum eum intelligi debere, cuius in paroecia domicilium sit, aut quasi domicilium alterutrius contrahentis. Verum quia nonnunquam difficile est iudicare, certo ne constet de quasi-domicilio, hand paucia matrimonia fuerunt obiecta periculo ne nulla essent; multa quoque, sive inscitia hominum sive fraude, illegitima prorsus atque irrita reprehensa sunt.

Haec dudum deplorata, eo crebris accidere nostra aetate videmus, quo facilius ac celerius commeatus cum gentibus, etiam disiunctissimis, perficiuntur. Quamobrem sapientibus viris ac doctissimis visum est expedire ut mutatio aliqua induceretur in iure circa formam celebrandi connubii. Complures etiam sacerorum Antistites omni ex parte terrarum, praesertim e celebrioribus civitatibus, ubi gravior appareret necessitas, supplices ad id preces Apostolicae Sedi admoverunt.

Flagitatum simul est ab Episcopis, tum Europae plerisque, tum aliarum regionum, ut incommodis occurreretur, quae ex sponsalibus, idest mutuis, promissionibus futuri matrimonii privatim initis, derivantur. Docuit enim experientia satis, quae secum pericula ferant eiusmodi sponsalia: primum quidem incitamenta pecunia causamque cur inexpertae puellae decipiuntur; postea dissidia ac lites inextricabiles.

His rerum adiunctis permotus SS.mi D. N. Pius PP. X pro ea quam gerit omnium Ecclesiarum sollicitudine, cupiens ad memorata damna et pericula removenda temperatione aliqua uti, commisit S. Congregationi Concilii ut de hac re videret, et quae opportuna aestimaret, Sibi proponeret.

Voluit etiam votum audire Consilii ad ius canonicum in unum redigendum constituti, nec non Emorum Cardinalium qui pro eodem codice parando speciali commissione electi sunt:

a quibus, quemadmodum et a S. Congregatione Concilii, conventus in eum finem saepius habiti sunt. Omnia autem sententiis obtentis SS.mi Dominus S. Congregationi Concilii mandavit, ut decretum ederet quo leges a Se, ex certa scientia et matura deliberatione probatae, continerentur, quibus sponsalium et matrimonii disciplina in posterum regeretur, eorumque celebatio expedita, certa atque ordinata fieret.

In executionem itaque Apostolici mandati S. Concilii Congregatio praesentibus litteris constituit atque decernit ea quae sequuntur.

### DE SPONSALIBUS.

I. — Ea tantum sponsalia habentur valida, et canonicos sortiuntur effectus, quae contracta fuerint per scripturam subsignatam a partibus et vel a parocho, aut a loci Ordinario, vel saltem a duobus testibus.

Quod si utraque vel alterutra pars scribere nesciat, id in ipsa scriptura adnotetur; et alius testis addatur, qui cum parocho, aut loci Ordinario, vel duobus testibus, de quibus supra, scripturam subsignet.

II. — Nomine parochi hic et in sequentibus articulis venit non solum qui legitime praest paroeciae canonice erectae; sed in regionibus, ubi paroeciae canonice erectae non sunt, etiam sacerdos cui in aliquo definito territorio cura animarum legitime commissa est, et parocho aequiparatur; et in missionibus, ubi territoria necum perfecte divisa sunt, omnis sacerdos a missionis Moderatore ad animarum curam in aliqua statione universaliter deputatus.

### DE MATRIMONIO.

III. — Ea tantum matrimonia valida sunt quae contrahuntur coram parocho vel loci Ordinario vel sacerdote ab alterutro delegato, et duobus saltem testibus, iuxta tamen regulas in sequentibus articulis expressas, et salvis exceptionibus quae infra n. VII et VIII ponuntur.

IV. — Parocho et loci Ordinarius valide matrimonio adsistunt:

§ 1° a die tantummodo adeptae possessionis beneficii vel initi officii, nisi publico decreto nominatio fuerint excommunicati vel ab officio suspensi;

§ 2° intra limites dumtaxat sui territorii; in quo matrimonii nedum suorum subditorum, sed etiam non subditorum valide adsistunt;

§ 3° dummodo invitati ac rogati, et neque vi neque metu gravi constricti requirant excipiantque contrahentium consensum.

V. — Licit autem adsistunt:

§ 1° constito sibi legitime de libero statu contrahentium, servatis de iure servandis;

§ 2° constito insuper de domicilio, vel saltem de menstrua commemoratione alterutrius contrahentis in loco matrimonii;

§ 3° quod si deficiat, ut parochus et loci Ordinarius licite matrimonio adsint, indigent licentia parochi vel Ordinarii proprii alterutrius contrahentis, nisi gravis intercedat necessitas, quae ab ea excusat.

§ 4° Quoad vagos, extra casum necessitatis parocho ne liceat eorum matrimonii adsistere, nisi re ad Ordinarium vel ad sacerdotem ab eo delegatum delata, licentiam adsistendi impetraverit.

§ 5.<sup>o</sup> In quolibet autem casu pro regula habeatur, ut matrimonium eoram sponsae parochio celebretur, nisi aliqua iusta causa excusat.

VI. — Parochus et loci Ordinarius licentiam concedere possunt alii sacerdoti determinato ac certo, ut matrimonii intra limites sui territorii adsistat.

Delegatus autem, ut valide et licite adstitat, servare tenetur limites mandati, et regulas pro parochio et loci Ordinario n. IV et V superius statutas.

VII. — Imminente mortis periculo, ubi parochus, vel loci Ordinarius, vel sacerdos ab alterutro delegatus, haberi nequeat, ad consilendum conscientiae et (si casus ferat) legitimationi prolis, matrimonium contrahi valide ac licite potest coram quolibet sacerdote et duobus testibus.

VIII. — Si contingat ut in aliqua regione parochus locive Ordinarius, aut sacerdos ab eis delegatus, coram quo, matrimonium celebrari queat, haberi non possit, eaque rerum conditio a mense iam perseveret, matrimonium valide ac licite iniri potest emiso a sponsis formaliter consensu coram duobus testibus.

IX. — § 1.<sup>o</sup> Celebrato matrimonio, parochus, vel qui eius vices gerit, statim describat in libro matrimoniis nomina coniugum ac testimoniis, locum et diem celebrati matrimonii, atque alia, iuxta modum in libris ritualibus vel a proprio Ordinario praescriptum; idque licet alius sacerdos vel a se vel ab Ordinario delegatus matrimonio adstiterit.

§ 2.<sup>o</sup> Praeterea parochus in libro quoque baptizatorum adnotet, coniugem tali die in sua parochia matrimonium contraxisse. Quod si coniux alibi baptizatus fuerit, matrimonii parochus notitiam initi contractus ad parochum baptismi sive per se, sive per curiam episcopalem transmittat, ut matrimonium in baptismi librum referatur.

§ 3.<sup>o</sup> Quoties matrimonium ad normam n. VII aut VIII contrahitur, sacerdos in priori casu, testes in altero, tenentur in solidum cum contrahentibus curare, ut initum coniugium in praescriptis libris quam primum adnotetur.

X. — Parochi qui heic hactenus praescripta violaverint, ab Ordinariis pro modo et gravitate culpae puniantur. Et insuper si aliquius matrimonio adstiterint contra praescriptum § 2<sup>o</sup> et 3<sup>o</sup> num. V, emolumenta stolae sua ne faciant, sed proprio contrahentium parochio remittant.

XI. — § 1.<sup>o</sup> Statutis superius legibus tenentur omnes in catholica Ecclesia baptizati et ad eam ex haeresi aut schismate conversi (licet sive hi, sive illi ab eadem postea defecerint), quoties inter se sponsalia vel matrimonium ineant.

§ 2.<sup>o</sup> Vigent quoque pro iisdem de quibus supra catholicis, si cum acatholicis sive baptizatis, sive non baptizatis, etiam post obtentam dispensationem ab impedimento mixtae religionis vel disparitatis cultus, sponsalia vel matrimonium contrahunt; nisi pro aliquo particulari loco aut regione aliter a S. Sede sit statutum.

§ 3.<sup>o</sup> Acatholici sive baptizati sive non baptizati, si inter se contrahunt, nulli ligantur ad catholicam sponsalium vel matrimonii formam servandam.

Praesens decretum legitime publicatum et promulgatum habeatur per eius transmissionem ad locorum Ordinarios: et quae in eo disposita sunt ubique vim legis habere incipiunt a die solemnis Paschae Resurrectionis D.N.I.C. proximi anni M DCCCC VIII.

Interim vero omnes locorum Ordinarii current hoc decretum quamprimum in vulgo edi, et in singulis suarum dioecesum parochialibus ecclesiis explicari, ut ab omnibus rite cognoscatur.

Praesentibus valiturs de mandato speciali SSMI D. N. Pii PP. X, contrariis quibuslibet etiam peculiari mentione dignis minime obstantibus.

Datum Romae die II mensis Augusti anni M DCCCC VII.

† VINCENTIUS CARD. EP. PRAENEST.

Praefectus.

C. DE LAI, Secretarius.

#### EX SS. CONGREGATIONIBUS ROMANIS

##### SENTENTIAE NOVISSIMAE SELECTAE

###### Ex Congregatione Indicis.

Decr. d. xxvi mens. Iulii M DCCCC VII in indicem librorum prohibitorum relata sunt opera, quae sequuntur:

ERNEST DIMMET, *La pensée catholique dans l'Angleterre contemporaine*. (Paris, 1906).

EDOUARD LE ROY, *Dogme et critique*. (Paris).

JEAN LE MORIN, *Vérités d'hier? La théologie traditionnelle et les critiques catholiques*. (Paris, 1906).

ALBERT HOUTIN, *La crise du clergé*. (Paris, 1907).

*Coenobium*, Rivista internazionale di libri studi. (Lugano, 1906-1907).

###### Ex commissione de re biblica.

*De auctore et veritate historica quarti Evangelii*. — Propositis sequentibus dubiis Commissione Pontificia «de re biblica» sequenti modo respondit:

Dubium I. — Utrum ex constanti, universali ac solempni Ecclesiae traditione iam a saeculo II decurrente, prout maxime eruitur: a) ex SS. Patrum, scriptorum ecclesiasticorum, imo etiam haereticorum, testimoniis et allusionibus, quae, cum ab Apostolorum discipulis vel primis successoribus derivasse oportuerit, necessario nexus cum ipsa libri origine cohaerent; b) ex recepto semper et ubique nomine auctoris quarti Evangelii in canone et catalogis sacrorum Librorum; c) ex eorumdem Librorum vetustissimis manuscriptis codicibus et in varia idioma versionibus; d) ex publico usu liturgico inde ab Ecclesiae primordiis toto orbe obtinente; praescindendo ab argumento historico demonstretur Ioannem Apostolum et non alium quarti Evangelii auctorem esse agnoscendum, ut rationes a criticis in oppositum adductae hanc traditionem nullatenus infirmit? — Resp. affirmative.

Dubium II. — Utrum etiam rationes internae quae eruuntur ex textu quarti Evangelii seiunctim considerato, ex scribentis testimonio et Evangelii ipsius cum I. Epistola Ioannis Apostoli manifesta cognitione, censendae sint confirmare traditionem, quae eidem Apostolo quartum Evangelium indubitanter attribuit? Et utrum difficultates, quae ex collatione ipsius Evangelii cum aliis tribus desumuntur, habita prae oculis diversitate temporis, scopi et auditorum pro quibus vel contra quos auctor scripsit, solvi rationabiliter possint, prout SS. Patres et exegetae catholici passim praestiterunt? — Resp. affirmative ad utramque partem.

Dubium III. — Utrum, non obstante praxi quae a primis temporibus in universa Ecclesia constantissime viguit, arguendi ex quarto Evangelio tamquam ex documento proprio historico, considerata nihilominus indole peculiari eiusdem Evangelii, et intentione auctoris manifesta illustrandi et vindicandi Christi divinitatem ex ipsis factis et sermonibus Domini, dici possit facta narrata in quarto Evangelio esse totaliter vel ex parte conficta ad hoc ut sint allegoriae vel symbola doctrinalia, sermones vero Domini non proprie et vere esse ipsius Domini sermones, sed compositiones theologicas scriptoris, licet in ore Domini positas? — Resp. negative.

Die autem 29 Maii ann. 1907, in Audientia amboibus reverendissimis Consultoribus ab Actis benigne concessa, Sanctissimus praedicta responsa rata habuit ac publice iuris fieri mandavit.

FULCRANUS VIGOURUX P. S. S.

LAURENTIUS JANSSENS O. S. B.

Consultores ab Actis.

#### DIARIUM VATICANUM

(Die XXI mens. Iulii - d. XX mens. Augusti MDCCCCVII).

###### Coram SSmo admissiones.

Praeter Purpuratos Patres, Urbanos Antistites aliasque viros, qui sui quisque munera gratia Pontificem de more adiverunt, peculiari nota digni sunt iuxta admissionis diem: Beniaminus Mignana, rector Seminarii Hispani de Urbe cum suis alumnis; manus peregrinorum Teutonorum; Robertus Razzoli O. F. M., Terrae Sanctae Custos; Ianuarius Granito de Belmonte, archiepiscopus Edessen, Nuntius Apostolicus apud Austrorum Hungarorumque Imperium; Wolfram de Rotenhan, dynasta, legatus extraordinarius et minister cum omni potestate Borussorum apud Apostolicam Sedem; Yasuya Uchida, Iaponiorum Caesaris legatus extraordinarius ad Pontificem, litteras Imperatoris sui perferens; Antonius Augustus Intreccialagli ex Ord. Carmelitarum exalceatorum, episcopus Calatanisiaden. consecratus; manus peregrinorum e Civitatibus Foederatis Americae Septentrionalis; Camillus Rospigliosi, Princeps Urbanus, praefectus nobilibus protectoribus sacri lateris Pont. Max.; Maximilianus D'Erp, dynasta, legatus extraordinarius atque minister cum omni potestate Belgarum apud Apostolicam Sedem; manus peregrinorum ex Germania et Canadensi civitate.

###### Pontificiae electiones.

Dominicus Fanucchi, Vicarius generalis Lucan., et Dominicus Mannaioli, Pontificiae domus antistites, alter episcopus Civitatis Plebis, alter episcopus Montis Falisci eliguntur.

— Michael Sleutyes O. F. M. inter iudices S. Congregationis de Propaganda Fide, et Doroteus Cornelisse eiusdem Ord. inter iudices S. C. Studiorum referuntur.

###### Vita functi viri clariores.

Die XXVI mens. Iulii Iosephus Mesegner y Costa, archiepiscopus Granaten., Villabreni in diocesi Derthusen. ortus d. IX mens. Novembr. M DCCC XLIV, episcopus electus an. M DCCCC V.

— Die XXX Gustavus Adolphus de Pélagot, episcopus Trecen. ab anno M DCCC XCVIII, n. in civitate Le Puy d. XIV mens. Iunii M DCCC XL; hoc anno M DCCCC VII promotus ad metr. Chamberien.

— Die X mens. Augusti Dominicus Svampa, Purpuratus Pater, archiepiscopus Bononiensis, in oppido Montegranaro dioecesis Firman. n. d. XIII mens. Iunii an. M DCCC LI, episcopus Forolivien. electus d. XXVIII

mens. Maii M DCCC LXXXVII, in Metropolitan. Bononiens. translatus et in Sacrum Senatum cooptatus d. XXIV mens. Maii M DCCC XCIV, tit. S. Onuphri ad Ianiolum; vir scientia et pietate insignis.

#### Varia.

Die IX mens. Augusti « Pontificia Capella » in Xystino sacello habetur ob expletum feliciter a SSmo quartum Pontificatus annum.

## ANNALES

### Mauritana res.

Nubes, iam dudum in Mauritano imperio collectae, fulmine ex improviso atque lacrimabili luctu discissae sunt; fanaticus enim incolarum furor, « bellum sanctum » indicens, ad arma concurrit, Europaeos Israelitasque petiit, qui non omnes navium auxilio ad ancoras in portibus deligatarum, vitam servare potuerunt, dum sua bona omnia igni atque populationibus ferociter traduntur.

Haec Casablanca ad urbem maxime contigerunt, ubi Gallici Hispanique milites, post Algeciranum coetum in tutelam delegati, ad vim coercendam haud satis valuere. Ad ultionem igitur ventum est: novi milites missi, qui tamen litora suo sanguine madefecerunt; urbs fulmineis tormentis oppugnata atque Drude, Gallici imperatoris, supremae ditioni commissa. Eequid vero? Alio vastatio et bellum conversa sunt, et Mazaghan, Mogador, Rabat urbes in discrimen adductae.... Quamquam rei exitus indubius plane videtur: nostris enim temporibus ardua non tam ab indigenarum decertationibus plerumque gignuntur, quam e zelotypia Europaearum nationum, consilia et facta ipsa saepius resolvente; hodie contra — dum saltem scribimus — Europaeorum gubernia, nullo excepto, in id consentiunt, vim esse adhibendam, per eamque ordinem omnino restituendum.



### Haganus de pace conventus alter.

Dum in nordica Africa sic tonant bellica tormenta multaque inferunt caedes et funera, Hagae, quasi ad illusionem, de pace conventus lente multisque verbis producitur tum de neutrorum iuribus, tum de circumsessionibus, de praedarum tribunali, deque arbitrorum sententiis revisendis utraque parte consentiente. Certae vero deductiones minime intercessisse videntur, ita ut legatorum unus haec, argute quidem, scripsisse dictetur: facilius esse inter bellantes duos quam inter neutros quadraginta bellum componere.



### Regalia itinera.

Optatae pacis pignora deducenda ne potius erunt a regalibus itineribus, quae hisce etiam diebus producta sunt? Affirmant saltem diaria de conventu illo quem Swinemunde Guilelmus, Germanorum Caesar, et Nicolaus Russorum, adstantibus inde Babilio, hinc Iswoski administris, habuere; itemque de Balkanica quaestione esse sentiendum circa visitationem a Ferdinando, Bulgariae principe, ad Franciscum Iosephum, Europaeorum Imperatorum Nestorem, Ichl peractam; item denique quod Danorum regem ad Islandiam sollemni pompa appulerit,

unde autumant illins insulae « authonomian » late propugnatam aqua ratione iri compositum. Si rosae sint, flores suo tempore effundent,



### Inter Russiam et Iaponiam foedus iustum.

Foedus inter Russiam et Iaponiam est tandem omni ex parte absolutum; eius vi duo imperia invicem sese obstringunt non solum ad cuiusque territorii integratatem servandam, sed etiam Sinarum; ac praeterea ut singulæ pactiones a recenti bello initiae immutatae prorsus maneant.



### Italici motus in Catholicam Religionem.

Patriae caritas nos tenet, quominus de illiberalibus illis motibus fuse loquamur, quos, calumniae artibus per morum speciem, factiosi homines contra Christi religionem passim in Italia ita excitarunt, ut infima plebs Purpuratum ipsum Patrem Apostolicae Sedis negotiis publicis praefectum contumeliis minisque aggredi propalam non dubitaverit. Id unum animadvertisimus, iisdem modis religiosum bellum in Christi asseclas apud Gallos novissime susceptum; id hodie ominamur, ne sana mens intelligensque Italorum iudicium pessimo exemplo vinci sinant.

## PUBLICI PER ORBEM COETUS LEGIBUS FERENDIS

In Anglia rerum ad exteriores administer Grey late disseruit de Macedonum legibus renovandis, de ratione civili cum Aegyptiis et Congolensi imperio habenda, deque novo foedere cum Russiis in Asiae quæstiones inter utrumque populum dirimendas. Agraria Hiberniae res iterum in disceptationem est adducta.

In Austria rationibus accepti et expensi pro tempore approbat, feriae indictae.

In Perside lata lex de militaribus copiis ad imperii fines augendis.

## PER ORBEM

Die XXI mens. Iulii M DCCCVII ad medium noctem naves vapore actae *Columbia* et *Sanctus Petrus* apud S. Francisci litora in civitatibus foederatis Americae Septentrionalis, ob nebulam visum celantem, altera in alteram occurrit. *Columbia* fluctibus obruitur, secum viatores, ad centum numerum, misere trahens.

— die XXIV coram Belgarum rege magna que populi multitudine Zeebruse portus navibus aperitur.

— d. XXV Puteolis ad Neapolim vita decedit Aloisius Fabron, italus pictor late concelebratus. Natus erat Augustae Taurinorum an. MDCCCLXV.

— d. XXVII Londino nunciatur Moray Williams, clarus archaeologicae rei studiosus, ad Petersfield splendidum romani ruris monumentum effodisse.

— d. XXVIII incendium, inter saltatorios ludos in lignea domo exortum atque celerrime diffusum, Coney Island, notissimum illum ac pulcherrimum oblationum congestum Nor-

diae Americae, late subvertit. Damna ad septuages centena millia libellarum computantur.

— die XXIX incendium alterum dolo malo, uti apparet, Neo-Eboraci in urbe accensum, aedes tabulatis sex constantes absentes, mortem horrendam inquinilis procurat, mulieribus praesertim et pueris.

Die VI mens. Augusti, Metarum in urbe, adstante Purpurato Patre Vincentio Vannutelli, episcopo Praenestino ac Pontificis legato, XVIII conventus Eucharisticus sollemni ritu inaugurator.

— d. IX Senis diem obit supremum Stanislans Mocenni, qui fuit bellicae rei in Italia minister.

— d. XII Lutetiam Parisiorum attingit, magna pompa acceptus, Scipio Burghesius, Romanus princeps, automobili curru Pekino, ex Sinanum urbe capite, profectus.

— d. XV, Doemitz, in Mekleburgensi opido, dynamites officina immenso fragore incenditur atque in ruinam cum pluribus opidi domibus corrut. Mortui inde incolae duodecim; vulneribus affecti quinquaginta.

— d. XVII in balneorum statione Oldorchard ad Neo-Eboracum, negotiatorum vicus, centum et ultra domus complectens, flammis voratur.

— d. XIX, Perusiae, ubi antiquae artis exhibiti patet, musicae sacrae Italici cultores congregantur de sua arte provehenda simul discantatur.

\*\*\*\*\*

## AENIGMATA

Et viridi musco et tenui sum vilior alga:  
crede mihi; qui me vendidit, ille furit.  
Insero litterulas, quas inseruisse placebit:

c, f, g, p, t, si libet, ecce tenes.

C quatinus arma ferox: ille est Telamonius Ajax,  
sive is, quem Paridis tela dedere neci.

F doctus tetigisse feras celerique sagitta  
hostes, dente quidem candidus, ore niger.

G laetas segetes et Bacchi munera donat;  
arcet arundinea falce Priapus aves.

P nemora et saltus habitat, P devia montis:  
si procul aspicias, fleete, viator, iter.

T color, haud qualis violae florisve rosarum,  
nec iam virginis excubat ille genis.

I. B. PESENTI

Ex sociis, qui huius aenigmatis interpretationem ad Commentarii moderatorem miserint intra menses duos, unus, sortitus, gratis accipiet IOANNIS BATTANII opus, cui titulus:

ANTHOLOGIA PARVA GRAECO-LATINA (VII).

Aenigmata an. X, n. VI proposita his respondent:

1) Cos-sus; 2) Lucerna-Lacerna.

Ea rite soluta miserunt:

Henr. Tarallo, *Neapolis*. — F. Arnori, *Mediolano*. — Petrus Tergestinus. — Collegium Iosephinum, *Vatisio*. — Alois. Cappelli, *Senis*. — Callistus Amalberti, *Altio Intemelio*. — F. X. B. *Florentia*. — F. Guerra, *Aletto*. — Rich. Brondel, *Brugis*. — Rich. Müller, *Berolino*. — I. Ortiz, *Moretia*. — I. Walter, *Neo-Eboraco*. — Ioan. Rappel, *Aureliano*. — I. Ramabaldi, *Geneva*. — Fr. Bonaventura, *Aterno*. — Rich. Lefebre, *Parisias*. — V. Starace, *Panormi*.

Sortitus est praemium:

IOANNES RAPPEL,  
ad quem missum est PETRI ANGELINI opus

DE POETIS ET NUMERIS LATINIS.

Sponsor: IOANNES BAPTISTA CIAMPI, iurisperitus.

ROMAE — Ex officina *Pacti*, Phil. Cuggiani.

(Passim retractavit hodiernisque scenis aptavit I. F.)

PHI.  
ANAST.

Cremetur!  
 Quando se, regni deus,  
 Patriam suosque funeri infesto dedit  
 « Sepultus ante fata sub tumulo evomat  
 Animam scelestam ».... Miles, in scutum leva (1).  
 Iam me superba voce bubonem voca;  
 Voca malorum nuncium. In tabulis nota:  
 « Simplex probusque nec fide, nec time ». .  
 Ferale monstrum! I, patere, quam simplex tibi  
 Probusque poenam iungit horribilem. Iace  
 Vivus sub atro lapide, dum nigram expuas  
 Rabiosus animam; frater accedet comes.  
 Ibo et sepulcro funus invisum dabo.  
 Praeite socii: pompa feralis vocat (2).

## SCENA VIII.

LONGINUS, UMBRAE; deinde PROCLUS et MILITES (3).

LONG. Quis me recessus, quaere, sepositi, tegat  
 Mundi latebra? Merge lucentem diem,  
 Invise sol! Horrenda tenebrarum chlamys,  
 Caligo, noctis horror, umbrarum chaos  
 Involvat orbem; redde inaspectam fugam.  
 O ludus Aulae! Dira Fortunae rota,  
 Infesta fata, lucis inimicæ faces!  
 Huc e superbo tractus in praeceps gradu  
 Tandem revolvor? Profugus, abiectus, miser,  
 Mundi per omnes erro ludibrium plagas.  
 A latere civis; miles a tergo premit;  
 A fronte quisquis scelera perpessus mea.  
 Undique tenemur; fugio, nec fugio tamen.  
 Alios ut hostes fugiat, o quoties sibi  
 Obiecta mentis forma terrores movet!  
 Quoties tremendos Ditis obtrudit rogos!  
 Suspicio caelum?... Fulmen extimeo miser.  
 Despicio terram? Opaca Tartarei reor  
 Hiare mundi. Fremuit a tergo sonus?  
 Adesse culpae suadet ultorem timor;  
 Mox latera pulsat horror. Hinc illinc faces  
 Ardere visae: flagra terribili quat  
 Sonore; totus undique in nostros metus  
 Coniurat orbis. Maior arcanas tamen  
 Vexat medullas angor: aeternus iecur  
 Corredit intus cancer et fibras vorat.  
 Sic inter istas mentis attonitae faces,  
 Inter tumultus, taedia, pavores, minas,  
 Speciesque poenae mille, proh poenae genus!,  
 Volvor, revolvor, rapior, abripior, premor....  
 Vincis, Pelagi, vincis.... Excidimus loco.  
 Excidimus?... (4). Unde? Throno Caesar, ducum  
 Propago. Ab arce tu quoque aetherea ruis,  
 Rutile, rutile Phaeton: fuge ignem tetrici  
 Iovis!... Vocamus... St!... Coeca Longinum undique  
 Fortuna perque lustra, subque cornibus

(1) Attollitur Zeno in scuta militum.

(2) Excunt omnes.

(3) Clamantibus intus militibus, prodit Longinus collo in fasciam sericam nigrum tamquam in laqueum inserto, nudam sicam dextera praeferen, sine galero, horrente capillo.

(4) Insanit.

Lunae silentis quaerit. Heus caelum tace!  
 Bene est. Reliquiae sortis antiquae (1), et hoc et hoc,  
 Quantum placetis? Numquid ad manes iter,  
 Iter retrusum, triste, latebrosum, cavum  
 Effodiet iste ligo? Penetremus. Meis  
 Rigidior astris terra successum negat.  
 Ista (2) cavabo melius in terra specum.  
 Age, cuspis, auspicare pallentis viam  
 Erebi: repostas ore ferrato fibras  
 Punge et repunge (3), donec impuro fugax  
 E pectore, indignata cum gemitu stygem  
 Reposcit anima. Sin aberrabit scopo  
 Ferrum, subibo pondus infelix trabem.  
 Inferne princeps, torve tartarei lacus  
 Regnator, uni tota Longini retro,  
 Cui servit aetas, pande inexpleti sinus  
 Orci, sepultos hospes irrumpit lares.  
 Valete, sidera, semper infestas mihi  
 Largita flamas: stygia me tellus manet.  
 Valete, turres, unde per praeceps cado  
 In alta Ditis, Tartari ad fundum ultimum.  
 Vale, aula, casus una molitrix mei;  
 Aliam sub aulam vulnere aeterno....

UMBRA PELAGII (4) Cave;  
 Stant alia fata. Cernis? Hic lethi crux,  
 Haec te securis vulnere aeterno premet.

LONG. Premet, premet, premet haec securis vulnere  
 Aeterno? Adeste, tela, mendacem probo (5).  
 Pretiose funis, digne cui regem trabe  
 Nectas ab alta, pugio fecellit fidem;  
 Tu frange certus colla!....

UMBRA GAZAEI (6) Craterem prius  
 Fuso replebis sanguine.

LONG. O moles mali!  
 PROCL. (7) Pergite, nefandum rapite Longinum ocius.  
 Ocius eatur, ocius.

LONG. O miser fuge....  
 Styx alta, styx profunda!...

PROCL. (7) Properate ocius....

LONG. Quis me per auras turbo?...

UMBRA HARMATII Sta; clausa est via.

LONG. Etiamne ad Orcum?

PROCL. (7) Prendite.

LONG. O tellus, hia!...

PROCL. (8) Hac, hac; prope est, tenete.

LONG. Stat furii caput

MILITES. Ultro vovere. Adeste; qua datur.... (9)

Retro!

PROCL. Stringite fugacem. Miles, obtrunca, feri (10).

(Ad proximum numerum).

(1) Fasciam et pugionem indicat.

(2) Sedens in terra, pugione fodit.

(3) Pectus suum indigans.

(4) Praeferens securim, qua plexus est, excutit Longino sicam.

(5) Fasciam circumdatam collo arripit, suspendum meditans.

(6) Calicem manu tenens, ex quo venenum hauserat.

(7) Clamans post aulam.

(8) Irruens in scenam cum suis militibus.

(9) Fugit ad portas, quas omnes occupant milites.

(10) Capitur Longinus a militibus et vi rapitur. — Scena mutatur; apparet Zeno in sepulcro, thorace detracto, oneratus vinculis.

PROSPECTUS SUBNOTATIONIS  
Comm. VOX URBIS in an. MDCCCCVII.

Premium annuae subnotationis est in Italia Libell. 4,80;  
ubique extra Italiam Libell. 6,25; Doll. 1,25; Sch. 5; March. 5;  
Rubl. 3; Coron. 6,25 *recto tramite* mittendum ad

ARISTIDEM LEONORI EQUITEM  
COMMENTARII "VOX URBIS", POSSESSOREM ET ADMINISTRATOREM  
ROMAM, via Alessandrina, 87.

PRAEMIA SOCIIS CONSTITUTA:

Ex subnotatoribus quisque KALENDARIO a *Vox Urbis*  
expresse edito fruetur.

Qui socios novos comparaverit duos premiumque eorum  
subnotationis mi-  
serit, subnotationem gratis omnino sibi habebit.

Qui triginta socios novos comparaverit ante Iulium  
mensem – bi-  
bliopolis exceptis – dimidiatum premium itineris habebit a quovis Europae  
loco ubi vivat Romam usque, atque inde in domum suam, secunda, prouti  
vocant, ferriveharum classi usus.

Qui sexaginta socios novos comparaverit uti supra,  
eodem iti-  
nere gratis omnino fruetur.

Kalendis Ianuariis MDCCCCVII "cumulativa", subnotatio instituta est  
inter comm. *Vox Urbis* et Romanum diarium *Corriere d'Italia*.  
Ven in Italia lib. 18; apud exteras gentes lib. 34,50.